




ՀՈՎՎԱԿԱՆ ԱՅՑԵԼՈՒԹՅՈՒՆ

Վեհափառ Հայրապետի բարեհաճ կարգադրությամբ և Հարավային Ամերիկայի հայոց հայրապետական պատվիրակ և Արգենտինայի հայոց առաջնորդ տ. Բարգեն արքեպ. Ապատյանի հրավերով, 1972 թվականի դեկտեմբերի 20-ից մինչև 1973 թվականի հունվարի 29-ը հովվական այցելությամբ Բուենոս-Այրես էր գտնվում Մայր Աթոռի միաբան և Ծիրակի թեմի առաջնորդական տեղապահ տ. Նարեկ վրդ. Ծաքարյանը:

Ստորև մեր ընթերցողների ուշադրությանն ենք ներկայացնում տ. Նարեկ վարդապետի հովվական այցից որոշ լուրեր, արգենտինահայ մեր ազգային-եկեղեցական կյանքի մասին:

Տ. Նարեկ վրդ. Ծաքարյանը հետևյալ Արգենտինայի հյուրընկալ հողի վրա ապրող հայ ժողովրդի պանդուխտ զավակներին է հաղորդել Ամենայն Հայոց Վեհափառ Հայրապետի օրհնություններն ու հայրական ողջույնները և վերածնված հայոց աշխարհի խանդավառ լուրերով մխիթարել հայրենակարոտ հայորդիների սրտերը:

Սփյուռքի մեր ազգային-եկեղեցական կարեւորագույն և մեծագույն թեմերից մեկն է Արգենտինայի տիրախմած թեմը իր հայկականությամբ, իր հոծությամբ, իր կազմակերպվածությամբ, թեմ, որ ապրում է եկեղեցական, կրթական, մշակութային, հայրենասիրական եռուն կյանքով, շնորհիվ արգենտինյան բարեխմած կառավարության հոգածությանն ու հովանավորությանը, հայրապետական պատվիրակ սրբազան հոր ու Կենտրոնական վարչության եկեղեցաշեն ու կրթամեքենայի ջանքերի:

Արգենտինահայ համայնքը, որն իր ծո-

ցում հաշվում է ավելի քան 60.000 հայ ազգաբնակչություն, կենտրոնացած մայրաքաղաքում և Գորդոբայում, առավելապես կազմված է կիլիկեցիներից, Կ. Պոլսո հայերից և ռումինահայերից:

Բուենոս-Այրեսում կան չորս փառավոր հայկական եկեղեցիներ. ս. Գրիգոր Լուսավորիչ, ս. Գևորգ, Վարագա ս. Խաչ և ս. Հակոբ, բոլորն էլ մասամբ ապահովված են հավատավոր և պաշտոնաւեր հոգևոր հովիվներով և եկեղեցական խորհուրդներով:

Թեմում բարձր մակարդակի վրա է դրված նաև նոր սերնդի հայեցի ու քրիստոնեական դաստիարակության գործը, շնորհիվ ստեղծված երկրորդական և միջնակարգական մակարդակի ուսումնական ցանցի:

Անցյալ տարի է ավարտվել ս. Գրիգոր Լուսավորիչ եկեղեցու կողքին կառուցումը երկրորդական հայ վարժարանի մեծ շենքի, որի հիմնարկեքի օրհնությունը կատարել է Հայոց Հայրապետը 1968 թվականի ամռանը, երբ հովվապետական այցելությամբ գտնվում էր Բուենոս-Այրեսում: Անցնող չորս տարիների ընթացքում պատվիրակ սրբազան հայրը, Կենտրոնական վարչությունը և թեմի ողջ հայ ժողովուրդը ոչինչ չեն խնայել՝ բարձրացնելու համար կրթության այդ նոր օջախի շենքը, որի պաշտոնական բացումը կատարելու համար դարձյալ հրավիրվել է Հայոց Հայրապետը այս տարվա ամռանը:

Թեմում գործում են բազում հայրենակցական, մշակութային, սպորտային, երաժշտական, երիտասարդական կազմակերպություններ, որոնցից յուրաքանչյուրն ունի իր համապատասխան գեղեցիկ և բոլոր հարմարություններով օժտված ակումբները: Չա-

փազանց մխիթարական է արձանագրել հայ երիտասարդության կազմակերպվածությունը, երիտասարդությունը, որը խանդավառ է հայ մշակույթով և իր ժողովրդի ստեղծած հոգևոր ու մտավոր գանձերով:

Թեմում գոյություն ունի նաև հայ մամուլ, որը պատվով է կատարում իր առաքելությունը:

Թեմը հայրենասիրական սրտագին կապեր է պահպանում մշակութային հոդի վրա մայր հայրենիքի հետ: Հաճախ այստեղ են այցելում հայրենական գիտության, արվեստի և այլ բնագավառի ներկայացուցիչներ, որոնց ներկայությունը այստեղ ստեղծում է ջերմ հետաքրքրություն դեպի հայրենի մշակույթն ու գիտությունը:

Հովվական իր այցելության օրերին տ. Նարեկ վարդապետը քանիցս պատարագել է ս. Գրիգոր Լուսավորիչ առաջնորդանիստ Մայր եկեղեցում և Բանին կենաց քարոզությամբ մխիթարել հավատացյալներին:

Տ. Նարեկ վարդապետը այցելություններ է տվել նաև տեղի արգենտինյան եկեղեցական և պետական իշխանության ներկայացուցիչներին՝ հաղորդելով Նորին Արքայական ողջույնները:

Հունվարի 5-ին տ. Նարեկ վարդապետը այցելություն է տալիս Բուենոս-Այրեսում արտաքին գործերի մինիստրությանն առընթեր կրոնական գործերի տեսուչ դոկտ. Ռոբերտո Ռոման Բրավոյին՝ նրան հաղորդելով Հայոց Հայրապետի ողջույներն ու օրհնությունները: Կրոնական գործերի հարգելի տեսուչը ջերմորեն ընդունելով Հայոց Հայրապետի ողջույններն ու օրհնությունները, գրույցի ժամանակ ասում է. «Ն. Արքայություն Վազգեն Ա կաթողիկոսը մեր ժամանակի քրիստոնեական եկեղեցու մեծագույն հոգևոր պետերից մեկն է, որի անձնավորության մեջ մարմնավորվում է հայ ժողովրդի հոգեվոր ու իմացական բարեմասնությունները: Նորին Արքայական անձով և Բարգեն արքեպիսկոպոսի միջոցով այստեղ, Բուենոս-Այրեսում, մենք ավելի և ավելի ենք սիրում տաղանդավոր հայ ժողովրդին: Ես այնքան մեծ հաճությամբ եմ լսել, որ Նորին Արքայանը դարձյալ այստեղ են հրավիրել Արգենտինայի մեր բարեկամ ու պատվական հայերը: Լսել եմ, որ Նորին Արքայությունը բարեհաճել է ընդունել այդ հրավերը: Մենք պատրաստ ենք սիրով ու հարգանքով դիմավորել Նրան: Երբ, հարգելի վարդապետ, վերադառնաք ս. Էջմիածին, խնդրում եմ իմ հարգանքներս հաղորդել Նորին Արքայականը և ասել, որ ես մեծ սիրով եմ պահում ս. Էջմիածնի այն փոքրիկ հիշատակ-խաչը,

որն ինձ նվիրել է Նորին Արքայությունը իր վերջին այցելության ժամանակ այստեղ»:

Հունվարի 29-ին տ. Նարեկ վրդ. Ծաքարյանը վերադառնում է Մայր Աթոռ՝ հովվական իր այցելությունից անմոռանալի հուշերով ու տպավորություններով. «Ամեն անգամ տարբեր թեմաների շուրջ ինչ գրույց կամ հանդիպում էլ տեղի ունենար, դպրոցականի թե եկեղեցականի, մտավորականի թե առևտրականի, մանկավարժի թե հասարակական գործչի հետ, բոլորի խոհերն ու մտորումները դառնում են Մայր Աթոռ ս. Էջմիածնի, Հայոց Հայրապետի գործունեության և վերածնված հայոց աշխարհում ապ-



Բուենոս-Այրես. տ. Նարեկ վարդապետը և տ. Ծավարչ քահանան Ապրիլյան եղևոնի հուշարձանի առջև

րող ու ստեղծագործող մեր հայրենաբնակ ժողովրդի պատմական նվաճումների և նրա պաշտոն ապագայի մասին»,—եզրակացնում է տ. Նարեկ վարդապետն իր ուղևորության հուշերի մեջ՝ շեշտելով նաև հայրենիք-սիրտը կապերի էլ ավելի սերտացումն ու ամրապնդումը՝ ի շահ մեր եկեղեցու և հայրենիքի: